

四庫全書

集部

欽定四庫全書

石倉歷代詩選卷四十二

明 曹學佺 編

盛唐十一

祖詠 洛陽人

古意

楚王竟何去
獨自留巫山
偏使世人見
迢迢江水間
駐舟春谿裏
誓願拜靈顏
夢寐覩神女
金沙鳴珮環
閒艷

絕世姿令人氣力微含笑默不語化作朝雲飛

歸汝墳山莊留別盧象

淹留歲將宴久廢南山期舊業不見棄還山從此辭
漚麻入南澗刈麥向東菑對酒雞黍熟閉門風雪時
非君一延首誰慰遙相思

夕次圃田宅

前路入鄭郊尚經百餘里馬煩時欲歇客歸程未已落
日桑柘陰遙村煙火起西還不遑宿中夜渡涇水

扈從御宿池

君王既巡狩輦道入秦京
遠樹低槍壘孤峰入幔城
寒踈清禁漏夜警羽林兵
誰念迷方客長懷魏闕情

贈苗發員外

宿雨朝來歇空山天氣清
盤雲雙鶴下隔水一蟬鳴
古道黃花落平蕪赤燒生
茂陵雖有病猶得伴君行

答王維留宿

四年不相見相見復何為
握手言未畢却令傷別離
升

堂還駐馬酌醴便呼兒語默自相對安用傍人知

長樂驛留別盧象裴總

朝來已握手宿別更傷心灞水行人渡商山驛路深故
情君且足謫宦我難任直道皆如此誰能淚滿襟

送劉高郵稅使入都

常聞積歸思昨夜又兼秋鄉路京華遠王程江水流吳
歌喧兩岸楚客醉孤舟漸覺潮初上淒然多暮愁

觀華嶽

西入秦關口南瞻驛路連彩雲生闕下松樹到祠邊作
鎮當官道雄都俯大川蓮峰徑上處彷彿有神仙

泗上馮使君南樓作

井邑連淮泗南樓向晚過望灘沙鷺起尋岸浴童歌近
海雲偏出蕪秋雨更多明晨擬回棹鄉思恨風波

蘇氏別業

別業居幽處到來生隱心南山當戶牖澧水映園林屋
覆經冬雪庭昏未夕陰寥寥人境外閒坐聽春禽

汝墳別業

失路農為業移家到汝墳
獨愁常廢卷多病久離羣
鳥雀垂窗柳虹霓出澗雲
山中無外事樵唱有時聞

過鄭曲

路向滎川谷晴來望盡通
細煙生水上圓月在舟中
岨勢迷行客秋聲亂草蟲
旅懷勞自慰浙浙有涼風

宿陳留李少府揆廳

相知有叔卿訟簡夜彌清
旅泊倦愁卧空堂聞曙更
風

簾搖燭影秋雨帶蟲聲歸思那堪說悠悠限洛城

題韓少府水亭

梅福幽棲處佳期不忘還鳥啼當戶竹花繞傍池山水
氣侵堦冷松陰覆座閒寧知武陵趣宛在市朝間

題遠公經臺

蘭若無人到真僧出復稀苔侵行道席雲濕坐禪衣澗
鼠緣香案山蟬噪竹扉世間長不見寧止暫忘歸

中峰居喜見苗發

自得中峰住深林亦閉關經秋無客到入夜有僧還暗
澗泉聲小荒岡樹影閒高窗不可望星月滿空山

江南旅情

楚山不可極歸路但蕭條海色晴看雨江聲夜聽潮
留南斗近書寄北風遙為報空潭橋無媒贈洛橋

泊揚子津

纔入維揚郡鄉關此路遙林藏初過雨風退欲歸潮江
大明沙岬雲帆礙浦橋客衣今日薄寒氣近來饒

七夕

閨女求天女更闌意未闌
玉庭開粉席羅袖捧金盤
向月穿鍼易臨風整線難
不知誰得巧明旦試相看

望薊門

燕臺一望客心驚
蕭鼓喧喧漢將營
萬里寒光生積雪
三邊曙色動危旌
沙場烽火連胡月
海畔雲山擁薊城
少小雖非投筆吏
論功還欲請長纓

家園夜坐寄郭微

前堦微雨歇開戶散窺林月出夜方淺水涼池更深餘
風生竹樹清露薄衣襟遇物遂遙歎懷人滋遠心依稀
成夢想影響絕徽音誰念窮居者明時嗟陸沈

清明宴司勳劉郎中別業

田家復近臣行樂不違親霽日園林好清明煙火新以
文長會友惟德自成鄰池照窗陰晚杯香藥味春簷前
花覆地竹外鳥窺人何必桃源裏深居作隱淪

汝墳秋同仙洲王長史翰聞百舌鳥

秋天聞好鳥驚起出簾帷却念殊方月能鳴已後時遷
喬誠可早出谷此何遲顧影慙無對懷羣空所思淒涼
歲欲晚蕭索燕將辭留聽未終曲彌令心獨悲高飛憑
力致巧轉任天姿返覆喧而靜間關斷若遺花繁上林
路霜落汝川湄且長凌風翮乘風自有期

寄王長史

汝潁俱宿好往來託層巒終日何寂寞繞籬生蕙蘭
終南望餘雪

終南陰嶺秀積雪浮雲端林表明霽色城中增暮寒

萬楚

題江潮莊壁

田家喜秋熟歲宴林葉稀禾黍積場圃植梨垂戶扉野
閒犬時吠日暮牛自歸時復落花酒茅齋堪解衣

小山歌

人說淮南有小山淮王昔日此登仙城中雞犬皆飛去
山上壇場今宛然世人貴身不貴壽共笑華陽洞天口

不知金石變長年謾在人間戀攜手君能舉帆至淮南
家住盱眙余先諳桐栢亂流平入海茱萸一曲沸成潭
憶記來時魂悄悄想見仙山衆峰小今日長歌思不堪
君行為報三春鳥

詠蘆

玳瑁昔稱華玲瓏薄絳紗鈎銜門勢曲節亂水紋斜日
弄長飛鳥風搖不卷花自當分內外非是為驕奢

五日觀妓

西施謾道浣春紗碧玉今時闢麗華
眉黛奪將萱草色紅裙妬殺石榴花
新歌一曲令人艷醉舞雙眸斂鬢斜
誰道五絲能續命却令今日死君家

驄馬

金絡青驄白玉鞍長鞭紫陌野遊盤
朝驅東道塵恒滅暮到河源日未闌
汗血每隨邊地苦蹄傷不憚隴陰寒
君能一飲長城窟為盡天山行路難

茱萸女

山陰柳家女九日采茱萸復得東鄰伴雙為陌上妹
插枝著高髻結子置長裾作性常遲緩非關詫丈夫
平明折林樾日入返城隅俠客要羅袖行人挑短書
蛾眉自有主年少莫踟躕

題情人藥欄

斂眉語芳草何許太無情正見離人別春心相向生

王之渙

并州人

送別

楊柳東風樹青青
夾御河近來攀折苦
應為別離多

涼州詞

黃河遠上白雲間
一片孤城萬仞山
羌笛何須怨楊柳
春光不度玉門關

宴詞

長堤春水綠悠悠
畎入漳河一道流
莫聽聲聲催去棹
桃谿淺處不勝舟

張旭

蘇州人

青谿泛舟

旅人倚征棹薄暮起勞歌
笑攬青谿月清輝不厭多

桃花谿

隱隱飛橋隔野煙
石磯西畔問漁船
桃花盡日隨流水
洞在清谿何處邊

山行留客

山光物態弄春輝
莫為輕陰便擬歸
縱使清明無雨色
入雲深處亦沾衣

春遊值雨

欲尋軒檻列清樽
江上煙雲向晚昏
須倩東風吹散雨
明朝却待入華園

一日書

春草青青萬里餘
邊城落日見離居
情知海上三年別
不寄雲間一紙書

柳

濯濯煙條拂地垂
城邊樓畔結春思
請君細看風流意

未減靈和殿裏時

王諲

後庭怨

君不見紅閨少女端正時
天天桃李仙容姿
幸得君王憐巧笑
披香殿裏薦蛾眉
蛾眉雙雙人共進
常恐妾身從此擯
甄妃為妬出層宮
班女因猜下長信
長信宮門閉不開
昭陽歌吹風送來
夢中魂魄猶言是
覺後精神尚未迴
念君嬌愛無終始
使妾長啼後庭裏
獨立每看

斜日盡孤眠直至殘燈死
秋日聞蟲翡翠簾春晴照面
鴛鴦水紅顏舊來花不勝
白髮如今雪相似傳聞紈扇
思未歇預想蛾眉上初月
如君貴偽不貴真還同棄
逐新人借問南山松葉意
何如北砌槿花新

夜坐看搗箏

調箏夜坐燈光裏却挂羅帷
露纖指朱絃一一聲不同
玉柱連連影相似不知何處
學新聲曲曲彈來未覩名
應是石家金谷裏流傳將滿
洛陽城

長信怨

飛燕倚身輕，爭人巧笑名。
生君棄妾意，增妾怨君情。
日落昭陽壁，秋來長信城。
寥寥金殿裏，歌吹夜無聲。

閨情

日暮裁縫歇，深嫌氣力微。
纔能收篋笥，懶起下簾帷。
怨坐空然燭，愁眠不解衣。
昨來頻夢見，夫婿莫應知。

十五夜觀燈

暫得金吾夜，通看火樹春。
停車傍明月，走馬入紅塵。
妓

雜歌偏勝場移舞更新應須盡記取說向不來人

賈至

字幼鄰
洛陽人

贈裴九侍御昌江草堂彈琴

朔風吹疎林積雪在崖巘鳴琴草堂響小澗清且淺沈
吟東山意欲去芳歲晚悵望黃綺心白雲若在眼

巴陵早秋寄荊州崔司馬吏部閤功曹舍人

謫居瀟湘渚再見洞庭秋極目連江漢西南侵斗牛滔
滔盪雲夢澹澹搖巴丘曠如臨渤澥宵疑造瀛洲君山

麗中波蒼翠長夜浮帝子去永久楚詞尚悲愁我同長
沙行時事加百憂登高望舊國胡馬滿東周宛葉遍蓬
蒿樊鄧無良疇獨攀青楓樹淚灑滄江流故人西掖寮
同扈岐陽蒐差池盡三黜蹭蹬各南州相去雖地接不
得從之遊耿耿雲陽臺迢迢王粲樓跂予暮霞裏誰謂
無輕舟

送友人使河源

送君魯郊外下車上高丘蕭條千里暮日落黃雲秋舉

酒有餘恨論邊無遠謀河源望不見旌旆去悠悠

送李侍御

我年四十餘已嘆前路短羈離洞庭上安得不引滿李
侯忘情者與我同疎懶孤帆泣瀟湘望遠心欲斷

送耿副使歸長沙

畫舸欲南歸江亭且留宴日暮湖上雲蕭蕭若流霞昨
夜相知者明發不可見惆悵西北風高帆為誰扇

送夏侯子之江夏

扣楫洞庭上清風千里來留歡一杯酒欲別復徘徊相
見楚山下漁舟隱釣臺羨君還舊里歸念獨悠哉

寓言二首

春草紛碧色佳人曠無期悠哉千里心欲采商山芝歎
息良會晚如何桃李時懷古晴川上佇立夏雲滋

凜凜秋閨夕綺羅早知寒玉砧調鳴杵始擣機中紈憶
昨別離日桐花覆井欄今來思君時白露盈階溥聞有
關河信欲寄雙玉盤玉以委貞心盤以薦嘉餐嗟君在

萬里使妾衣帶寬

燕歌行

國之重鎮惟幽都東威九夷北制胡五軍精卒三十萬
百戰百勝擒單于前臨滹沱後易水崇山沃野亘千里
昔時燕山重賢士黃金築臺從隗始倏忽興亡空薊丘
漢家又以封王侯蕭條魏晉為橫流鮮卑竊據朝五州
我唐區夏餘十紀軍容武備赫萬祀彤弓黃鉞授元帥
懇耕大漠為內地季秋膠折邊草腓治兵羽獵因出師

千營萬隊連旌旗望之如火忽電馳匈奴懾竄窮髮北
天荒萬里無塵飛君不見隋家昔為天下宰窮兵黷武
征遼海南風不競多死聲鼓卧旗折黃雲橫六軍將士
皆死盡戰馬空鞍歸故營時遷道草天下平白環入貢
滄海清自有農夫已高枕無勞校尉重橫行

巴陵寄李二戶部張十四禮部

江南春草初纂纂愁殺江南獨愁客秦中楊柳也應新
轉憶秦中相憶人萬里鶯花不相見登高一望淚沾巾

長門怨

獨坐思千里春庭曉景長
鶯喧翡翠幙柳暗鬱金堂
舞蝶縈愁緒繁花對靚妝
深情託瑤瑟絃斷不成章

銅雀臺

日暮銅臺靜西陵烏雀歸
撫絃心斷絕聽管淚霏微
靈几臨朝奠空牀卷夜衣
蒼蒼川上月應照妾魂飛

侍宴曲

雲陛褰珠扆天墀覆綠楊
隔簾妝隱映向席舞低昂
鳴

珮長廊靜開冰廣殿涼歡餘劍履散同輦入昭陽

對酒曲

梅發柳依依黃鸝歷亂飛當歌憐景色對酒惜芳菲
曲水浮花氣流風散舞衣通宵留暮雨上客莫言歸

送陸協律赴端州

越井人南去湘川水北流江邊數杯酒海內一孤舟
嶠同仙客京華即舊遊春心將別恨萬里共悠悠

送王員外赴長沙

攜手登臨處巴陵天一隅春生雲夢澤水溢洞庭湖共
歎虞翻枉同悲阮籍途長沙舊卑濕今古不應殊

長沙別李六侍御

月明湘水白露落洞庭乾放逐長沙外相逢路正難雲
歸帝鄉遠雁報朔方寒此別盈襟淚雍門不假彈

岳陽樓宴王員外貶長沙

極浦三春草高樓萬里心楚山晴靄碧湘水暮流深忽
與朝中舊同為澤畔吟停杯試北望還欲淚沾巾

詠馮昭儀當熊

白羽插雕弓
蜺旌動朔風
平明出金屋
扈輦上林中
逐獸長廊靜
吟鷹御苑空
王孫莫諫獵
賤妾解當熊

早朝大明宮呈兩省僚友

銀燭薰天紫陌長
禁城春色曉蒼蒼
千條弱柳垂青瑣
百轉流鶯繞建章
劍珮聲隨玉墀步
衣冠身惹御爐香
共沐恩波鳳池上
朝朝染翰侍君王

白馬

白馬紫連錢嘶鳴丹闕前
珂自蹀躞不要下金鞭

出塞曲

萬里平沙一聚塵
南飛羽檄北來人
傳道五原烽火急
單于昨夜寇新秦

春思二首

草色青青柳色黃
桃花歷亂李花香
東風不為吹愁去
春日偏能惹恨長

紅粉當壚弱柳垂
金花臘酒解酴醾
笙歌日暮能留客

醉殺長安輕薄兒

答嚴大夫

今夕秦天一雁來
梧桐墜葉搗衣催
思君獨步華亭月
舊館秋陰生綠苔

送南給事貶崖州

疇昔丹墀與鳳池
即今相見兩相悲
朱崖雲夢三千里
欲別俱為慟哭時

送李侍御赴常州

雪晴雲散北風寒
楚水吳山道路難
今日送君須盡醉
明朝相憶路漫漫

送王道士還京

一片仙雲入帝鄉
數聲秋雁至衡陽
借問清都舊花月
豈知遷客泣瀟湘

巴陵夜別王八員外

柳絮飛時別洛陽
梅花發後到三湘
世情已逐浮雲散
離恨空隨江水長

岳陽樓重宴別王八員外貶長沙

江路東連千里潮，青雲北望紫微遙。
莫道巴陵湖水濶，長沙南畔更蕭條。

初至巴陵與李十二白裴九同泛洞庭湖二首
江上相逢皆舊遊，湘山永望不堪愁。
明月秋風洞庭水，孤鴻落葉一扁舟。

楓岸紛紛落葉多，洞庭秋水晚來波。
乘興輕舟無近遠，白雲明月弔湘娥。

西亭春望

日長風煖柳青青北雁歸飛入窅冥
岳陽樓上聞吹笛能使春心滿洞庭

欽定四庫全書

石倉歷代詩選卷四十三

明 曹學佺 編

盛唐十二

崔國輔 吳郡人

從軍行

塞北胡霜下營州
索兵救夜裏偷道行
將軍馬亦瘦刀
光照塞月陣色明
如畫傳聞賊滿山
已共前鋒聞

雜詩

逢着平樂兒論文鞍馬前與酤一斗酒恰用十千錢後
余在關內作事多迷遭何肯相救援徒聞寶劍篇

古意

紅荷楚水曲彪爍爍晨霞未得雨回摘秋風吹却花時
芳不待妾玉珮無處誇悔不盛年時稼與青樓家

宿法華寺

松雨時復滴寺門清且涼此心竟誰證回憩支公牀壁

畫感靈跡龕經傳異香獨遊寄象外忽忽歸南昌

題豫章館

楊柳映春江江南轉佳麗吳門綠波裏越國青山際遊
宦常往來津亭暫臨憩驛前蒼石沒浦外湖沙細向晚
宴且平孤舟罔然逝雲留西北客氣歇東南帝獨有萋
萋心誰知怨芳歲

石頭灘作

悵矣秋風時余臨石頭瀨因高見超遠盡此數州內羽

山一點青海岸雜花碎離離樹木少潏潏湖波大日暮
千里帆南飛落天外須臾遂入夜楚色有微靄尋遠跡
已窮遺榮事多昧一身猶未理安得濟時代且泛朝夕
潮荷衣蕙為帶

漂母岸

泗水入淮處南邊古岬存秦時有漂母於此飯王孫王
孫初未遇寄食何足論後為楚王來誓欲荅母恩事迹
遺在此空傷千載魂茫茫水中渚上有一孤墩遙望不

可到蒼蒼煙樹昏幾年崩塚色每日落潮痕古地多隄
圯時哉不敢言向夕淚沾裳只宿蘆洲村

對酒吟

行行日將夕荒村古塚無人跡蒙籠荆棘一鳥吟屢勸
提壺沽酒喫古人不達酒不足遺恨精靈傳此曲寄言
世上諸少年平生且盡杯中醪

宿范浦

月暗潮又落西陵渡暫停村煙和海霧舟火亂江星路

轉定山遶塘連范浦橫鷗夷近何去空山臨滄溟

杭州北郭戴氏荷池送侯愉

秋近萬物肅况當臨水時折花贈歸客離緒斷荷絲誰
謂江國永故人感在茲道存過北郭情極望東菑喬木
故園意鳴蟬窮巷悲扁舟竟何待中路每遲遲

怨詞二首

妾有羅衣裳秦王在時作為舞春風多秋來不堪著
樓前桃李踈池上芙蓉落織錦猶未成蛩聲入羅幕

古意

玉龍薰繡裳着罷眠洞房不能春風裏吹却蘭麝香

襄陽曲二首

蕙草嬌紅萼時光舞碧雞城中美年少相見白銅鞮
少年襄陽地來往襄陽城城中輕薄子知妾解秦箏

魏宮詞

朝日照紅妝擬上銅雀臺畫眉猶未竟魏帝使人催

長信草

長信宮中草年年愁處生故侵珠履跡不使玉階行

長樂少年行

遺却珊瑚鞭白馬驕不行章臺折楊柳春日路傍情

湖南曲

湖南送君去湖北送君歸湖裏鴛鴦鳥雙雙他自飛

中流曲

歸時日尚早更欲向芳洲渡口水流急迴船不自由

王孫遊

自與王孫別頻看黃鳥飛應由春草誤著處不成歸

采蓮

玉淑花爭發金塘水亂流相逢畏相失竝著采蓮舟

子夜冬歌

寂寥抱冬心裁羅又裝裝夜久頻挑燈霜寒剪刀冷

麗人曲

紅顏稱絕代欲竝真無侶獨有鏡中人由來自相許

小長干曲

月暗送潮風相尋路不通菱歌唱不徹知在此塘中

王昭君

漢使南還盡胡中妾獨存紫臺綿望絕秋草不堪論

秦女卷衣

雖入秦帝宮不上秦帝牀夜夜玉窗裏與他卷衣裳

令別離

送別未能旋相望連水口船行欲映洲幾度急搖手

衛豔詞

淇上桑葉青青樓含白日比時遙望君車馬城中出

渭水西別李崙

隴右長亭堠山陰古塞秋不知嗚咽水何事向西流

送韓十四被魯王推遷往濟南府

西候情何極南冠怨有餘梁王雖好事不察獄中書

白紵辭

洛陽梨花落如霰河陽桃葉生復齊坐惜玉樓春欲盡

紅綿粉絮裏妝啼

九日

江邊楓落菊花黃
少長登高一望鄉
九日陶家雖載酒
三年楚客已沾裳

崔曙

宋州人

宿大通和尚塔敬贈如上人
兼呈常孫二山人
支公已寂滅
影塔山上古
更有真僧來
道場救諸苦
一承微妙法
寓宿清淨土
身心能自觀
色相了無取
森森松映月
漠漠雲近戶
嶺外飛電明
夜來前山雨
然燈見

棲鴿作禮聞信鼓曉霽南軒開秋華淨天宇願言出世
塵謝爾申及甫

送薛據之宋州

無媒嗟失路有道亦垂流客處不堪別異鄉應共愁我
生早孤賤淪落居此州風土至今憶山河皆昔遊一從
文章事兩京春復秋君去問相識幾人今白頭

山下晚晴

寥寥遠天淨谿路何空濛斜光照疎雨秋氣生白虹雲

畫山色暝蕭條西北風故林歸宿處一葉下梧桐

潁陽東谿懷古

靈谿氛霧歇皎鏡清心顏空色不映水秋聲多在山世
人久踈曠萬物皆自閒白鷺寒更浴孤雲晴未還昔時
讓王者此地閉玄關無以躡高步淒涼岑壑間

早發交崖山還太室作

東林氣微白寒鳥忽高翔吾亦自茲去北山歸草堂仲
冬正三五日月遙相望肅肅過潁上矚矚辨少陽川冰

生積雪野火出枯桑獨往路難盡窮陰人易傷傷此無
衣客如何蒙雨霜

奉試明堂火珠

正位開重屋明堂出火珠夜來雙月滿曙後一星孤天
淨光難滅雲生望欲無遙知太平代國寶在名都

途中曉發

曉霽長風裏勞歌赴遠期雲輕歸海疾月滿下山遲旅
望因高盡鄉心遇物悲故林遙不見況在落花時

緱山廟

遺廟宿陰陰孤峰映綠林步隨仙路遠意入道門深
澗水流年月山雲變古今祇聞風竹裏猶有鳳笙音

同諸公謁啓母祠

闕宮凌紫微芳草閉閒扉帝子復何在王孫遊不歸
春風鳴玉珮暮雨拂靈衣豈但湘江口能令懷二妃

九日登望仙臺仍呈劉明府容

漢文皇帝有高臺此日登臨曙色開三晉雲山皆北向

二陵風雨自東來
關門令尹誰能識
河上仙翁去不回
且欲近尋彭澤宰
陶然共醉菊花杯

登水門樓見亡友張貞期題望黃河詩因以感興

吾友東南美
昔聞登此樓
人從川上逝
書向壁中留
嚴子好真隱
謝公耽遠遊
清風初作頌
暇日復銷憂
時興文字古
跡隨山水幽
已孤蒼生望
空見黃河流
流落年將晚
悲涼物已秋
天高不可問
掩泣赴行舟

嵩山尋馮鍊師不過

青谿訪道凌煙曙王子仙成已飛去更值空山雷雨時
雲林薄暮歸何處

秦母潛

字季通
荆南人

冬夜寓居寄儲太祝

自為洛陽客夫子吾知音盡義能下士時人無此心奈
何離居夜巢鳥悲空林愁坐至月上復聞南鄰砧

春泛若耶谿

幽意無斷絕此去隨所偶晚風吹行舟花落入谿口際
夜轉西壑隔山望南斗潭煙飛溶溶林月低向後生事
且瀾漫願為持竿叟

題鶴林寺

道林隱形勝向背臨層霄松覆山殿冷花藏谿路遙珊
珊寶幡挂焰焰明燈燒遲日半空谷春風連上潮少憑
水木興暫令身心調願謝攜手客茲山禪誦饒

題栖霞寺

南山勢迴合靈境依此住殿轉雲崖陰僧探石泉度龍
蛇爭翕習神鬼皆密護萬壑奔道場羣峰向雙樹天花
飛不著水月白成路今日觀身我歸心復何處

送儲十二歸莊城

西坂何繚繞青林問子家天寒噪野雀日晚度城鴉寂
歷道傍樹曛隴原上霞茲情不可說長恨隱淪賒

送章彝下第

長安渭橋路行客別時心獻賦溫泉畢無媒魏闕深黃

鶯啼就馬白日暗歸林三十名未立君還惜寸陰

送崔員外黔中監選

持衡出帝畿星指夜郎飛神女雲迎馬荆門雨濕衣聽
猿收淚罷繫雁待書稀蠻貊雖殊俗知君肝膽微

送賈恒明府兼寄溫張二司戶

越客新安別秦人舊國情舟乘晚風便月帶上潮平花
路西施石雲峰勾踐城明州報兩掾相憶二毛生

送宋秀才

冠古積榮盛當時數戟門舊交丞相子繼世五侯孫長
劍倚天外短書盈萬言秋風一送別江上暗消魂

送鄭務拜伯父

名公作逐臣驅馬拂行塵舊國問鄒子勞歌過郢人一
川花送客二月柳宜春奉料竹林興寬懷此別晨

題招隱寺絢公房

開士度人久空巖花霧深徒知燕坐處不見有為心蘭
若門對壑田家路隔林還言證法性歸去比黃金

宿太平觀

夕到玉京寢
宵冥雲漢低
魂交仙室蝶
曙聽羽人雞
滴漉花上露
清泠松下谿
明堂訪真隱
揮手入無倪

題靈隱寺山頂禪院

招提此山頂
下界不相聞
塔影挂清漢
鐘聲和白雲
觀空靜室掩
行道衆香焚
且駐西來駕
人天日未曛

若耶谿逢孔九

相逢此谿曲
勝託在煙霞
潭影竹間動
巖陰簷外斜
人

言上皇代犬吠武陵家借問淹留日春風滿若耶

宿龍興寺

香刹夜忘歸松清古殿扉燈明方丈室珠繫比丘衣
月傳心靜青蓮喻法微天花落不盡處處鳥銜飛

茅山洞口

華陽仙洞口半嶺拂雲看窈窕穿苔壁差池對石壇
方隨地脉轉稍覺水晶寒未果變金骨歸來茲路難

滿公房

世界蓮花藏行人香火緣燈王照不盡中夜寂相傳

過融上人蘭若

山頭禪室挂僧衣窗外無人谿鳥飛黃昏半在下山路
却聽鐘聲連翠微

薛據

河中寶鼎人

古興

日中望雙闕軒蓋揚飛塵鳴珮初罷朝自言皆近臣光
華滿道路意氣安可親歸來宴高堂廣筵羅八珍僕妾

畫綺紈歌舞夜達晨四時固相代誰能久要津已看覆
前車未見易後輪丈夫須兼濟豈能樂一身君今皆得
志肯憐憔悴人

登秦望山

南登秦望山目極大海空朝陽半蕩漾晃朗天水紅谿
壑爭噴薄江湖遞交通而多漁商客不悟歲月窮振絳
迎早潮弭棹候長風予本萍泛者乘流任西東茫茫天
際帆栖泊何時同將尋會稽迹從此訪任公

西陵口觀海

長江漫湯湯近海勢彌廣在昔垺混凝融為百川決地
形失端倪天色潛滉漾東南際萬里極目遠無象山影
乍浮沉潮波忽來往孤帆或不見棹歌猶想像日暮長
風起客心空振蕩浦口霞未收潭心月初上林嶼幾邐
迴亭臯時偃仰歲宴訪蓬瀛真遊非外獎

出青門往南山下別業

舊居在南山夙駕自伊闕榛莽相蔽虧去爾漸超忽散

漫餘雪晴蒼茫季冬月寒風吹長林白日原上沒懷抱
曠莫伸相知阻胡越弱年好棲隱鍊藥在巖窟及此離
垢氛興來亦因物末路期赤松斯言庶不伐

題丹陽陶司馬廳壁

高鑒清洞徹儒風入進難詔書增寵命才子益能官門
帶山光晚城臨江水寒惟餘好文客時得詠幽蘭

早發上東門

十五能文西入秦三十無家作路人時命不將明主合

布衣空惹洛陽塵

閭防

晚秋石門禮拜

輕策臨絕壁招提謁金仙
舟車無遊徃崖嶠乃屬天
躑躅淹昃景夷猶望新弦
石門變暝色谷口生人煙
陽雁叫平楚秋風急寒川
馳暉苦代謝浮脆暫貞堅
永欲卧丘壑息心依梵筵
誓將歷劫願無以外物牽

宿岼道人精舍

金分四八
卷四十三
早歲參道風放情入寥廓重因息心侶遂果巖下諾斂
迹辭人間杜門守寂寞秋風剪蘭蕙霜氣冷淙壑山牖
見然燈竹房聞搗藥願言捨塵事所趣非龍蠖

夕次鹿門山作

龐公嘉遯所浪迹難追攀浮舟暝始至抱杖聊自閒雙
巖開鹿門百谷集珠灣噴薄湍上水春容谷裏山焦原
不足險梁壑未成艱我行自春仲夏鳥忽縣蠻蕙草色
已晚客心殊倦還遠遊非避地訪道愛童顏安能徇機

巧爭奪錐刀間

百丈谿新理茅茨讀書

浪迹棄人世還山自幽讀始傍巢由蹤吾其獲心曲荒
庭何所有老樹半空腹秋蛩鳴北林暮鳥穿我屋栖遲
樂遵渚恬曠寡所欲開卦推盈虛散帙攻節目養閒度
人事達命知止足不學東國儒俟時勞伐輻

與永樂諸公夜泛黃河作

煙深載酒入但覺暮川虛映水見山火鳴榔聞夜漁愛

茲山水趣忽與人世踈無暇然官燭中流有望舒

丁仙芝

潤州曲
阿人

贈朱中書

十年種田濱五湖十年遭滂盡為蕪頻年井稅常不足
今年緡錢誰為輸東鄰轉穀五之利西鄰販繒日已貴
而我守道不遷業誰能肯敢效此事紫微侍郎白虎殿
出入通籍廻天眷晨趨綵筆柏梁篇畫出雕盤太官膳
會應憐爾居素約可即長年守貧賤

戲贈姚侍御

繁霜曉幕鳴柏烏
侍子獸炭然金爐
重門啓鎖紫髯胡
新披驄馬隴西駒
頭戴獬豸急晨趨
明光殿前見天子
今日應彈佞倖夫

餘杭醉歌贈吳山人

曉幙紅襟燕
春城白項烏
只來梁上語
不向府中趨
城頭坎坎鼓
聲曙滿庭新
種櫻桃樹
桃花昨夜撩
亂開當軒
發色映樓臺
十千兌得餘
杭酒二月春
城長命杯酒

後留君待明月還將明月送君回

剡谿館聞笛

夜久聞羌笛寥寥虛客堂
山空響不散谿靜曲宜長
草木生邊氣城池泛夕涼
虛然異風出髣髴宿平陽

渡楊子江

旌節中流望空波兩畔明
林開楊子驛山出潤州城
海盡邊陰靜江寒朔吹生
更聞楓葉下浙瀝度秋聲

長寧公主舊山池

平陽舊池館寂寞使人愁
座卷流黃簾簾垂白玉鉤
庭閒花自落門閉水空流
追想吹簫處應隨仙鶴遊

京中守歲

守歲多然燭通宵莫掩扉
客愁當暗滿春色向明歸
玉斗巡初匝銀河落漸微
開正獻歲酒千里間庭闈

江南曲三首

長干斜路北近浦是兒家
有意來相訪明朝出浣紗
發向橫塘口船開值急流
知郎舊時意且請攏船頭

昨暝逗南陵風聲波浪阻入浦不逢人歸家誰信汝

張潮

一作張朝
曲阿人

江風行

壻貧如珠玉壻富如埃塵貧時不忘舊富日多寵新妾
本富家女與君為偶匹惠好一何深中門不曾出妾有
繡衣裳歲蕤金縷光念君貧且賤易此從遠方遠方三
千里思君心未已日暮情更來空望去時水孟夏麥始
秀江上多南風商賈歸欲盡君今尚巴東巴東有巫山

窈窕神女顏常恐遊此方果然不知還

長干行

憶妾深閨裏煙塵不曾識嫁與長干人沙頭候風色五
月南風興思君下巴陵八月西風起想君發揚子去來
悲如何見少離別多湘潭幾日到妾夢越風波昨夜狂
風度吹折江頭樹森森暗無邊行人在何處北客真王
公朱衣滿江中薄暮來投宿數朝不肯東好乘浮雲馳
佳期蘭渚東鴛鴦綠浦上翡翠錦屏中自憐十五餘顏

色桃花紅那作商人婦愁水復愁風

采蓮詞

朝出沙頭日正紅晚來雲起半江中
賴逢鄰女曾相識竝著蓮舟不畏風

江南行

茨菰葉爛別西灣蓮子花開猶未還
妾夢不離江水上人傳郎在鳳凰山

李嶷

少年行三首

十八羽林郎戎衣侍漢王
臂鷹金殿側挾彈玉輿傍
馳道春風起陪遊出建章

侍獵長楊下承恩更射飛塵生
馬影滅箭落雁行稀薄
暮隨天仗聯翩入瑣闈

玉劒膝邊橫金杯馬上傾
朝遊茂陵道依宿鳳凰城
豪吏多猜忌無勞問姓名

淮南秋夜呈周侶

天淨河漢高夜閒砧杵發清秋忽如此離恨應難歇風
亂池上萍露光竹間月與君共遊處勿作他鄉別

林園秋夜作

林卧避殘暑白雲長在天賞心既如此對酒非徒然月
色徧秋露竹聲兼夜泉涼風懷袖裏茲意與誰傳

袁瓘

明皇
時人

鴻門行

少年買意氣百金不辭費學劍西入秦結交北遊魏秦

魏多俠人與代亦殊倫由來不相識皆是暗相親寶馬
青絲轡狐裘貂鼠服晨過劇孟遊暮投咸陽宿然諾本
云云諸侯莫不聞猶思百戰術更逐李將軍始從灞陵
下遙遙度朔野北風聞楚歌南庭見胡馬胡馬秋正肥
相邀夜合圍戰酣烽火滅路斷救兵稀白刃縱橫逼黃
塵飛不息虜騎血灑衣單于淚沾臆獻凱雲臺中自言
塞上雄將軍行失勢部曲遂無功新人不如舊舊人不
相救萬里長飄颻十年計不就棄置難重論驅馬度鴻

門行看楚漢事不覺風塵昏寶劍中夜撫悲歌聊自舞此
曲不可終曲終淚如雨

惠文太子挽歌

寒仗丹旄引陰堂白日遠暗燈明象物畫水濕靈衣羽
化淮王去仙迎太子歸空餘燕銜土朝夕向陵飛

薛維翰

古歌二首

美人怨何深含情倚金閣不嘖復不語紅淚雙雙落

美人閉紅燭獨坐裁新錦頻放剪刀聲夜寒知未寢

春夜裁縫

珠箔因風起飛蛾入最能不教人夜作方便殺明燈

春女怨

白玉堂前一樹梅今朝忽見數花開
兒家門戶尋常閉
春色因何入得來

怨歌

百尺珠樓臨狹斜新妝能唱美人車
皆言賤妾紅顏好

要自狂夫不憶家

房琯

河南人

題漢州西湖

高流纏峻隅城下
緬丘墟決渠信浩蕩
潭島成江湖結
宇依迴渚水中
信可居三伏氣不蒸
四達暑自徂同人
千里駕鄰國五馬車
月出共登舟風生隨所如
舉麾指極浦欲極更盤紆
繚繞各殊致夜盡情有餘
遭亂意不開即理還暫祛
安得長晤語使我憂更除

許宣平

新安人


醉歌

負薪朝出賣沽酒日西歸
借問家何在穿雲入翠微

李陽冰

阮客舊居

阮客身何在仙雲洞口橫
人間不到處今日此中行



石倉歷代詩選卷四十三